

05. oktober 2021

UKA2021/28

Piffissaq piniarfiusoq tamaat isigalugu nalunaarutip aalajangersagaasa iluini, umimmannik ukiukkut piniarneq, taamaaliornermi assersuutigalugu Naternami pisassiissutit ukiakut pisarineqanngitsoortut ukiukkut iluaqutigineqarsinnaasunngorlugit pinissaat, qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. (Inatsisartunut Ilaasortaq Kristian Jeremiassen, Inuit Ataqatigiit)

Inatsisartunut ilaasortap Kristian Jeremiassenip Naternami umimmanniartarneq pillugu siunnersuutaanut Siumumit ima oqaaseqassaagut.

Siullermik siunnersuutip tunngaviatigut paasinaraluarluni, siunnersuuteqartup susassaqtunut tassalu KNAPK –mut minnerunngitsumillu Piniarnermut Siunnersuisooqatigiinnut, pineqartumullu Naternap eqqaamiuisa piniartuinut tusarniaasoqareersimanersoq takussutissaqanngilaq.

Minnerunngitsumillu siunnersuuteqartup nammineerluni oqaatigereerpaa pineqartumi sumiiffimmi ukiuunerani umimmaat tiffasittaqisut. Minnerunngitsumillu Siumumiit paaserusunnarpoq nuna pineqartumi Naternami umimmaqassuseq kisitsisinngorlugu qanoq inissisimanersoq qangalu kingullermik kisitsivigineqarsimanersoq. Tamannalu kingunerisussaavaa nunakut tiffasissumut ingerlasariaqartarneq.

Siullertut Siumumiit paaserusunnarpoq siunnersuuteqartup takorloorsimaneraa qanoq ittunik piniariarnissamik ukiuunerani piniartut angallateqassanersut. Tassami Siumumiit eqqarsaatigaarput qamuteralaat atorineqassanersut, imaluunniit qimussimik piniariartoqartassanersut pinngortitamut sunniutigisinnaasaai taakkununga assignngilluinnarmata.

Siumumiit isumaqarpugut siunnersuut aappassaaneerneqannginnerani ataatsimiitsitaliamut Ingerlatinneqaaqqaassasoq. Minnerunngitsumillu qulaani taaneqartunut tusarniaassutigineqaaqqaassasoq.

Taamak oqaaseqarluta Siumumiit siunnersuut aappassaaneerneqarnissaanut ingerlateqqinneqarnissaa innersuupparput.

Aslak W. Jensen, Siumut